

Nello Zuliani

IJ «BOGIANEN»

*Milasetent e ses. Nèir l'orisont
për Turin ch'a gëmmia sarà 'nt na tnaja;
ma Pero Mica a l'ha 'nviscà la... paja
e ij piemontèis a l'han aussà la front!*

*Sùbit apress un àutr aveniment
– nen arportà 'nt le pagine dla glòria –
ëd nòstr Piemont a l'ha cambià la stòria;
quandi na fomna, fija 'd pòvrà gent,*

*bin pràtica dij pòst e 'd soa Pianëssa,
sensa na frisa 'd tëmna a l'ha guidà
un cit drapel ëd granatié e soldà,
traversand Dòira, fin-a a la fortëssa.*

*Peui d'impit, da na galaria segreta,
a l'é intrà 'nt la sala 'nté ij fransèis,
sicur an nòstra tèra 'd buté rèis,
a balavo e a fasìo gaudineta*

*che, al comparì dë sta figura ardìa
a son rendusse, tant l'é stàit lè sbeuj.
Ël valor dë sta fomna a l'é l'orgheuj
ëd Pianëssa. Sò nòm? «Brica Marià».*

*Tra soldà, colonej e generaj,
milatërsent l'han fan-e përzoné
cola neuit dël sinch ëstèmber. D'amblé
senza crësta a son trovasse... ij Gaj!*

*E 'n pòchi di 'd bataje senza fren
ij turinèis, sautandje a baticòle,
ai fransèis a l'han fait aussé le sòle.
S'a bogio, gnente a fërma ij bogianen!*